



Kamis, 10 Oktober 2024

Ogen: Sakaria 14:20-21



"Ipersembahkan Guna Tuhan"



Tuhan nepa dirinta rikut ras tempasNa. Ertina maka dirinta enda e me cara Dibata hadir nuduhkan kerna kinimbisanNa. Kerinana iaturken Tuhan tudu ras sura-suraNa. Manusia itepaNa lako ncidahkan keleng ate Tuhan nandangi sekelewetna bage pe tinepa Dibata sideban. Erkiteken si e, maka dalanta dingeng caranta lako ncidahkan keleng ateNa e me alu mpersembahkan kerina geluhta man Tuhan saja. Perenungen man banta, kai kin ndia si persembahkan man Tuhan dingeng uga caranta nehken persembahen e? Mpersembahen si mbelina rikut pe si mehulina man baNa e me kula dingeng tendinta. Sura-sura Tuhan si sembah kita e, gelah tep-tep anak-anakNa nginget kerna keleng ate Tuhan si tetap icedahkan i bas kegeluhenta. La terjeng arah materi ngenca keleng ate si iberekenNa tapi pe arah gegeh ras kesehatan, kejuah-juahen rikut pe ras kemalemen ateta radu ras pasangan, anak-anak bage pe keluarganta. Ndauh kel belinen keleng ate Tuhan e arah mereken kejuah-juahen dingeng kemalemen ate asangkan materi sialoken. Erkiteken nggo sialoken pemere Tuhan, patutlah kita nehken tanggungjababta e me lako mpersembahkan dirinta rikut pe ras kerina si lit bas geluhta guna kemulian Tuhan.

"Ipersembahkan guna Tuhan"; teks wari enda ncidahkan maka kerina dampar kegeluhen tinepa Dibata mpersembahkan guna kemulianNa; barang-barang si ipake; giring-giring si lit bas pasangan kuda, kudin penanggeren, mangkuk kerinana i pake guna nehken persembahen. Sie enda nuriken maka seh kal perluna makeken si lit bas geluhta lako nehken persembahen man Tuhan. Teks enda pe ngerana man banta maka labo barang si mehenga ate Tuhan si persembahkan tapi barang si kin menurut manusia kurang mehergana (giring-giring, kudin ras mangkuk).

Persembahkan kerina si lit bas dirinta guna kemulian Tuhan alu pusuh si meciho dingeng dem pengataken bujur.

☞ *Sehkenlah persembahen si mehulina man Tuhan*